

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԱԶԳԱՅԻՆ ԺՈՂՈՎԻ ՆԱԽԱԳԱՀ

պարոն ՀՈՎԻԿ ԱԲՐԱՀԱՄՅԱՆԻՆ

Հարգելի պարոն Աբրահամյան

Հայաստանի Հանրապետության կառավարությունը Հայաստանի Հանրապետության Ազգային ժողովի պատգամավորներ Հովիկ Աբրահամյանի, Գալուստ Սահակյանի և Հովհաննես Սահակյանի՝ օրենսդրական նախաձեռնության կարգով ներկայացրած «Հայաստանի Հանրապետության քաղաքացիական օրենսգրքում փոփոխություն կատարելու մասին Հայաստանի Հանրապետության օրենքի նախագծի վերաբերյալ առարկություններ չունի:

Հարգանքով՝

ՏԻԳՐԱՆ ՍԱՐԳՍՅԱՆ

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՕՐԵՆՔԸ**

**Հայաստանի Հանրապետության քաղաքացիական օրենսգրքում փոփոխություն կատարելու  
մասին**

**Հոդված 1.** Հայաստանի հանրապետության 1998 թվականի մայիսի 5-ի քաղաքացիական օրենսգրքի 1217-րդ հոդվածի առաջին նախադասությունը շարադրել հետևյալ խմբագրությամբ. «Երկրորդ հերթի ժառանգներն են ժառանգատուի հարազատ, համահայր կամ համամայր եղբայրները եւ քույրերը»:

**Հոդված 2.** Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

**ՀԻՄՆԱՎՈՐՈՒՄ**

**«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻԱԿԱՆ ՕՐԵՆՍԳՐՔՈՒՄ ՓՈՓՈԽՈՒԹՅՈՒՆ  
ԿԱՏԱՐԵԼՈՒ ՄԱՍԻՆ ԵՆ ՕՐԵՆՔԻ ՆԱԽԱԳԾԻ**

ՀՀ քաղաքացիական օրենսգրքի 1217-րդ հոդվածը սահմանում է երկրորդ հերթի ժառանգների ցանկը, որի համաձայն՝ երկրորդ հերթի ժառանգներ են ժառանգատուի հարազատ եղբայրները եւ քույրերը Այսինքն ըստ էության օրենսդիրը ժառանգատուի ժառանգների թվում չի նախատեսել վերջինիս արյունակից /համահայր/ եւ արգանդակից /համամայր/ եղբայրներին եւ քույրերին: Սա ըստ էության նշանակում է, որ օրենսդիրը ժառանգատուին առավել մոտ ազգականներ է համարել օրինակ, հորեղբորը կամ վերջինիս որդուն, քան միեւնոյն հորից կամ մորից սերված եղբոր կամ քրոջը: Մինչդեռ այս մոտեցումը արդարացված չէ ոչ իրավական, ոչ էլ բարոյական տեսանկյունից: Ստացվում է, որ այն դեպքերում երբ ժառանգատուն տարաբնույթ պատճառներով /հիվանդության եւ այլն/ չի կարողանում կտակ թողնել, ապա օրենքի ուժով այդ անձինք չեն ժառանգում ժառանգատուի մահվանից հետո:

Հարկ է նշել, որ ներկայումս դատական պրակտիկան ընթանում է հենց այն ճանապարհով, որը ներկայացված նախագծի տրամաբանությունն է: Մասնավորապես, ՀՀ վճռաբեկ դատարանի 13.02.2009թ-ի ԵԱՆԴ/1823/02/09 որոշմամբ արտահայտված իրավական դիրքորոշումը փաստում է, որ ժառանգական իրավահարաբերություններում ժառանգատուի հարազատ եղբայրներին եւ քույրերին հավասարեցված են նաեւ ժառանգատուի հետ համահայր կամ համամայր քույրերը եւ եղբայրները:

Սակայն պետք է նշել, որ նույնիսկ ՀՀ ընտանեկան օրենսգիրքը որպես ինքնուրույն եւ առանձին եզրույթներ, օգտագործում է հարազատ, ինչպես նաեւ համահայր կամ համամայր եղբայրներ եւ քույրեր հասկացությունները՝ տարանջատում մտցնելով դրանց մեջ: Ուստի, ներկայացված նախագծով

Ժառանգատուի երկրորդ հերթի ժառանգներ են համարվել ինչպես հարազատ այնպես էլ համահայր և համամայր եղբայրներն ու քույրերը: